

Morning Dogri (NSD) Bulletin 07-10-2023

आकाशवाणी

- खजाना मंत्री निर्मला सीतारमण होर अज्ज नमीं दिल्ली च जीएसटी कौंसल दी 52मीं बैठक दी अध्यक्षता करगंन।
- केन्द्री गृहमंत्री अमित शाह होर केन्द्री इलाकाई कौंसल दी बैठक दी अध्यक्षता करने लेई अज्ज उत्तराखंड दे दौरे पर जांगन।
- ईरान दी मनुक्खी अधिकारें सरबंधी कारकून नरगिस मोहम्मदी होरें गी 2023 ब'रे दा नोबेल शांति पुरस्कार दित्ता जाग।
- सिक्किम च आए दे हाडें करी मरोने आलें दी गिनतरी 26 होई गई ऐ। मुख्मन्त्री होरें जंदी रातीं इक विशेष बैठक सदियै हालात दी समीक्षा कीती। प्रभावतें लेई बाद्ध राहत पैकेज दी घोषणा।
- एशियाई खेड्डें च भारत दा अजें तोड़ी दा बेहतरिन प्रदर्शन। अज्ज बडलै तोड़ी सुन्ने दे 25, चांदी दे 35 ते कैह दे 40 तगमें हासल करियै भारत नै 100 तगमें दा आंकड़ा पार करी लैता ऐ।

GST Council

केन्द्री खजाना मंत्री निर्मला सीतारमण होर अज्ज बडलै नमीं दिल्ली च जीएसटी कौंसल दी 52मीं बैठक दी अध्यक्षता करगंन। खजाना मंत्री होरें आक्खेआ जे इस बैठक च केन्द्री खजाना राज्यमंत्री पंकज चौधरी ते राज्यें ते केन्द्री शासत प्रदेशें दे खजाना मंत्री शामिल होंगन।

<><><><><><>

HM-Uttarakhand

केन्द्री गृहमंत्री अमित शाह होर अज्ज उत्तराखंड च केन्द्री क्षेत्रीय परिषद दी बैठक दी अध्यक्षता करगंन ते कन्नै भारतीय पुलिस विज्ञान कांग्रेस च बी शिरकत करगंन। राज्य दे टिहरी जिले दे नरेन्द्र नगर च केन्द्रीय क्षेत्रीय परिषद दी 24मीं बैठक लग्गा करदी ऐ। जेहदे च उत्तर प्रदेश, मध्यप्रदेश, छत्तीसगढ़ ते उत्तराखंड दे मुख्मन्त्रिएं दे शामिल होने दी मेद ऐ।

उत्तर प्रदेश दे मुख्ख योगी आदित्यनाथ होर इस बैठक च हिस्सा लैने लेई कल्लै दे गै उत्तराखंड पुज्जी गेदे न। गृहमंत्री हुंदा अज्ज देहरादून च 49मीं अखिल भारतीय पुलस विज्ञान कांग्रेस च हिस्सा लैने दा बी कार्यक्रम ऐ। पुलस विज्ञान कांग्रेस च 5^{जी} दे दौर च पुलस बवस्था, नशीले पद्धार्थ, अंदरूनी सुरक्षा, सोशल मीडिया दिएं चुनौतिएं ते समुदायिक सतह पर पुलस बवस्था दे विषयें दे बक्ख-बक्ख पैह्लुएं पर सोच बचार होग। इस कांग्रेस दा सरिस्ता पुलस अनुसंधान ते विकास ब्यूरो दे बैनर हेठ कीता जा'रदा ऐ।

<><><><><><><><>

Amit Shah

गृहमंत्री अमित शाह होरें आक्खेआ ऐ जे पिछले किश ब'रें च खब्बे घड़े आले अत्तवाद गी काबू करने च कामयाबी हासल होई ऐ ते एह लड़ाई हून फैसलाकुन गेढ च पुज्जी गई ऐ। गृहमंत्री होर खब्बे घड़े आले अत्तवाद कन्नै निबड़ने सरबंधी नमीं दिल्ली च लग्गी दी इक बैठक दी अध्यक्षता करा करदे हे। इस बैठक च खब्बे घड़े आले अत्तवाद कन्नै प्रभावत राज्यें दे मुख्खमंत्री, उपमुख्खमंत्री ते केई वरिष्ठ अधिकारी बी शामिल होए दे हे। श्री शाह होरें अपने संबोधन च आक्खेआ जे प्रधानमंत्री नरेन्द्र मोदी होंदी अगुवाई तैहत ते प्रभावत राज्यें दे साथ-सैहयोग कन्नै 2022 ते 2023 ब'रे च इसी लेइयै बड्डी कामयाबी हासल होई ऐ। उनें आक्खेआ जे एह ब'रा, एह प्रण लैने आला ब'रा ऐ जे अगले दऊं ब'रें च खब्बे घड़े आले अत्तवाद गी पूरी चाल्ली खत्म करी दित्ता जाग। श्री शाह होरें आक्खेआ जे सीएपीएफ दे 195 नमें कैप बनाए गे न ते 44 होर नमें कैप बनाए जांगन। उनें इस गल्ला पर बी जोर पाया जे जिनें इलाकें च खब्बे घड़े आले उग्रवाद गी खत्म करी दित्ता गेदा ऐ, उत्थें बरोबर निगरानी रखने दी लोड़ ऐ तां जे उत्थें परतियै एह समस्या नेई बनी जा।

<><><><><><><><>

Iran Human Rights

ईरान दी मनुक्खी अधिकारें सरबंधी कारकून नरगिस मोहम्मदी होरें गी महिलाएं दे खलाफ होने आले अपराधें गी लेइयै बुआज चुक्कने ते कम्में कारवाइएं लेई 2023 ब'रे दा नोबेल शांति पुरस्कार दित्ता जाग। इस पुरस्कार कन्नै सम्मानत होने आली ओह 19मीं महिला होंगन। ओह ईरान दे मुख्ख मनुक्खी अधिकारें आले कार्यकर्ताएं चा इक न।

नरगिस मोहम्मदी होर 13 बारी गिरफ्तार होई चुकी दियां न। उनेंगी 5 बारी कसूरवार करार दित्ता जाई चुके दा ऐ। उनेंगी 31एं बरें दी जेल दी सजा ते 154 कोडें दी सजा सनाई जाई चुकी दी ऐ। नोबेल शांति पुरस्कार नार्वे दी राजधानी ओस्लो च 10 दिसम्बर गी प्रधान कीता जाग। एहदे च तकरीबन 10 लक्ख अमरीकी डॉलर दी रकम दित्ती जाग।

<><><><><><>

Sikkim Floods

सिक्किम च आए दे हाडें करी मरोने आलें दी गिनतरी बधियै 26 तगर पुज्जी गई ऐ, जिसलै जे 142 लोक अजें बी लापता न। राज्य च 4 अक्टूबर गी तीसता नदी च हाड औने करी आले दुआले दे इलाकें पानी च डुब्बी गे हे। 11 सौ कोला मते मकान बुरी चाल्ली तबाह होई गे हे। अजें तोड़ी 2 ज्हार 413 लोकें गी बचाइयै सुरक्षत थाहरें पर पजाई दित्ता गेदा ऐ। जिसलै जे 26 लोक जेहडे बुरी चाल्ली घायल न, उंदा इलाज चलै करदा ऐ। मुख्यमंत्री प्रेम सिंह तमाग होरें कल रातीं अपनी सरकारी कोठी च इक बैठक सदिदयै हाडै कारण पैदा होई दी स्थिति दी समीक्षा कीती। मुख्यमंत्री होरें दस्सेआ जे सिक्किम ऊर्जा लिमिटेड दे सैहयोग कन्नै प्रभावत क्षेत्रें लेई विशेष राहत पैकेज योजना तैआर कीती गई ऐ। जेहदे तैहत मंगन जिले लेई 25 करोड़ ते गंगटोक, पैक्योग ते नामची जिले लेई 15-15 करोड़ रपे दी राहत पैकेज दित्ती जाग। एह राहत केन्द्र ते राज्य सरकार आस्सेआ घोषत राहत कोला बाद्दु ऐ।

<><><><><><>

EC-Observer

मुख्य निर्वाचन आयुक्त राजीव कुमार होरें चुनां निगरानें गी आक्खेआ ऐ जे ओ पूरी चाल्ली अजाद, निर्पक्ख, विजन कुसै लोभ लालच दे ते पारदर्शी चुनां करोआना जकीनी बनाने लेई आपूं च नेडमा तालमेल बनाइयै कम्म करन। एह गल्ल उनें कल मिजोरम, छत्तीसगढ़, मध्यप्रदेश, राजस्थान ते तेलंगाना च औंदे विधानसभा चुनाएं लेई तैनात कीते जाने आले निगरानें दी बैठका च आक्खी। मुख्य निर्वाचन आयुक्त होरें आक्खेआ जे चुनां निगराने दा कम्म सब्बने घडें गी इक बरोबर दे मौके उपलब्ध कराना ते चुनां दी पवित्रता गी बनाई रखना ऐ।

Cricket

आईसीसी क्रिकेट विश्व कप च हैदराबाद च खेड्डे गेदे मकाबले च पाकिस्तान नै नीदरलैंड गी 81एं रंजें कन्नै हराई दित्ता ऐ। अज्ज बंग्लादेश दा मकाबला अुगानिस्तान ते दक्खण अफ्रीका दा मकाबला श्रीलंका कन्नै होग।

<><><><><><>

Talanganana

तेलंगाना सरकार नै सरकारी स्कूलें ते पंचैत स्कूलें दे विद्यार्थिंणं लेई मुखमंत्री नाशता योजना शुरू कीती ऐ। राज्य दे सूचना प्रोद्योगिकी मंत्री के.तारकरामा राव होरें कल हैदराबाद च आक्खेआ जे इस योजना कन्नै राज्य दे 27 जहार सरकारी ते पंचैती स्कूलें दे 23 लक्ख कोला मते विद्यार्थिंणं गी फायदा पुज्जोग ते उनेंगी सत्तदार खुराक उपलब्ध कराइयै कुपोषण दी समस्याएं कन्नै निबडने च मदद होग। तारक रामा राव होरें भरोसा जताया जे इस योजना दी मदद कन्नै स्कूलें च विद्यार्थिंणं दी गिनतरी बी बधोग ते मते बच्चे पढाई आली बक्खी आकर्षत होंगन। इस योजना पर हर बरे 4 सौ करोड़ रपे दी रकम खर्च कीती जाग।

><><><><><>